

1 Timoti

Paul letawa bautaa Timoti mampe girumalena

¹ Ne Paul ipa Keriso Iesu aposeliwa dea. God no Inawamba ita Keriso Iesu, mida bedewe no insaisamba ituitana, ne dianene waaubaneiena.

² ✧ Ne otonaida Timoti sumanai bedewe waroneiana manawo leta ema girumantedina. No Mamamba God ita Tatamba Keriso Iesu saubu amonawa euwa, do mo nuapareu e baia ita wanwan euda eneempa! Niapo!

Laga apanawa mampo ewanadewaitana!

³ Ne bauta Masedoniawo a baiwantedine dieena ruawaite Epesus bedewe wanempa. Ne epe dieedina, ipawa e bedelawo apana isiwa sumanai waeuwaida eie gagalo da nambea waia e diamowo epu. ⁴ Do diamowo mai duduna ton-tau ba nosinosiu ebou reresu uaraia insamompa. Dewa sa uduudu ipa wawadiadia ipusiawaia wadedio bedelawo wisede, mai God nolawa sausaipona, dia. **Tane God nolawa ipa sumanai os mampe segaleide.** ⁵ Tane sumanai waeuwaida dewa eubu ema otedie wisede: **Nuala euda os mampe sosola do nuawadawadaitonuna. E mai kadi da dewasano nuala wawusampa, ita do sumanai dodomana eudida nualawo winompo wanlempa.** ⁶ Apana isiwa sumanai waeuwa intawa ema enaiane ita gagalo ipusiawaia kainokaino waie waimoi. ⁷ Mo menamodia

✧ 1:2: Aposel 16.1

Moses anaanawa waeuwa apanawa wanantopona. Tane dima mo waie ita umanawa gagalowantoi ipawaida mai atentoipona, di badowa eneie waeuwantoi.

⁸ No atenten, Moses anaanawa ipa euda naita no anaana sa God insedia rua waeuwantonta. ⁹ Tane ema do wapo insena: Moses anaanawa ipa mai apana dodomanau eubu baibu, dia. Tane anaana sa ipa mo mida anaana ampuialala, asipotalala, God sawasiawaia apanawa ita kadi dewalala baibu. Tane do apana isiwa God umanawa mai waipona, dima kakaiwa uduudu mai wiwirawantoi, mamamau ba inainau bomoi, apana sosou epaboi, ¹⁰ ninantoi, apana mona muba sosou mona do ninantoi, ioto muba dewa ipa deawaa dewasai, apana mo sosou da poisamoie mane wadapua baiwa gimaramoi, laga wai, do laga mampe benemasikintoi, ba nitu isiwa mampe sumanai waeuwa dodomana ampuiasai. Anaana apana dewa inainambu ema dewamoia baibu winede. ¹¹ Tane God sumanai waeuwa euda no baimba itun. Me ipa mida no wadaposisaitana, Gagalo euda sapawaida do ne witanawosano benemantedina. Sumanai waeuwa sa ita Gagalo euda ne amonantedina deawaida wade, mai nambenambe.

Paul God sauwa euda baiwa auwasade

¹²⁻¹³ ✧ Ne Keriso Iesu no Tatamba, mida ne nolana baiwa muka nena, auwasadina. Imanamampe ne Keriso wakadisasadine ita me apanawaida wareuwamodine kadimodine, tane ideita Keriso sumanainalene me nolawa baiwa

✧ **1:12-13:** Aposel 8.3; 9.4,5

ne sonabanene itunen. Ne sumanaisia wainedina walamawe dewa kadiu ema insakoa mampe dewamodinee, sa baiwa me ne nuaparenalene kadina insendabuasan.

¹⁴ Tatamba me amonawa euwa debamaia ne osonawo memediaubedie sumanai ita nuawadawada dosane Keriso Iesu bedewe ne nen.

¹⁵ Aia ema ipa sumanaiwalalaida: Keriso Iesu kadi apanawa inamopia baiwa tawo osowe iene wisen. Tane ne Paul ipa kadi debama dewalala, mai mida da rua. **¹⁶ Ne ipa kadiwaida dewalala apanawa dea os. Tane Keriso Iesu me nuawadawadawa mampe walama daumawa bedewe nuawa aiaisiwa mampe ne onianedi wandie inanen.** Sa ipa eueuwa mo mida me bedewe sumanaintopue ita inawinakasala wadapua baiwa. Ipawa ema baiwa God ne nuaparenalene inanen. **¹⁷ Ne God wadaposisadina, me dea os ipa Godida, no wareremba wanwankasalala, mai diala, me God ewasasiawaia wande. Ebo debama ita sapaida ande ita ando me mampe winakasala!** Ulaipa, amen.

¹⁸ Ne otona Timoti, dima imanamampe apana isiwa Aleu kakaiwa diamona rua e umanaa waiena deawaa ne wadina. Gagalona tauma dieedina insene mampe sumanai onawa deaitopa onaitona. ¹⁹ Ona bedewe sumanaia wadaadodepi, ita mai kadi da dewasawo nuawawusampa, dia. Sosomba isiwa dewa eubu ema adiananamone emoiena baiwa sumanai bedewe omaidasaiena. **²⁰ Sumanai bedewe omaomalala bedeuwo sosou nata ipa Imeneus ita Alekisanda. Mo nata matangelau donsapua baiwa otamone Seitan witapemona, mo aten**

wadapue God wakadisaia gagalowa epua baiwa.

2

Raupari ita God wadaposiwa waeuwa

¹ Timoti, gagalo ema ipa debamawaida ne wadina, e etee ruawa sumanailala diadewasamoa: **E apana uduudu baibu rauparitonune God irisanune ita auwasanuna.** ² Warere ita mo mida gabeman mukawa wadane onialeia baibu rauparitonuna ita no sumanailala wanwan euda obasa bedewe God sawantonte dodomana os wainentaa baiwa.

³ Dewa ema eudida, God no Inawamba menasadia rua. ⁴ **Me menasadia apana uduudu kadi bedewe waimoia inantopue ulaipa gagalowa atenidantopu.** ⁵ **God dea os wande, tane apana dea God ita no sawanambo enedie banlanedia God mampe wineta. Me ipa apanaida Keriso Iesu,** ⁶ **mida me meba etepa itune ena apana uduudu malesamopie inamopia baiwa.** Gagalo ema umanawa God walama euda itudiawo benemantoio apana etei. ⁷ ✧ Nola ema baiwa God ne sonabanene aposel bedeuwo itunena ne uwa daitada apanawa uduudu waeuwamope ulaipa sumanai gagalowa benemamopo aten-topu. Ne mai e lagaeipona, dia, tane ulaipa dieedina.

⁸ Ne menanedia ekelesia uduudu bedeuwo apana mona kakaiwaida waimompe witapu wadaposisampe rauparintompa. Tane mai

✧ 2:7: 2 Timoti 1.11

wawakadikadi ba nuasigasiga do rauparitomp, dia.

⁹ ✧ Ne do menanedia ioto gara deaitopa taumompa, sa ipa mai ete os benawa baiwa uwau di taumompa, gold kibokiborala, posarula uwataubu eubu, ba gara eubuida taumompe etepu benasampa. ¹⁰ Tane mo dewau euda de-wasampe mampe benantomp. Ioto mida waiase, “No ipa sumanailala wainitana,” mo ideita epe dewantomp.

¹¹ Ioto ekelesia auweia bedewe nuau aiaisiwa mampe dainantopu wampue God aiawa waeuwa asisudewantopu. ¹² Ita ne mai menaneipona ioto apana mona osouwo muka wadapu ba waeuwamopu, tane waeuwa bedewe mo daina os waimomp.

¹³ ✧ Ne epe wadina, ipawa God Adam bauta de-wasan ita muriwa me sowa Iwi dewasa. ¹⁴ ✧ Ita mai Adam Seitan lagawa sumanaiwalepona, dia. Tane i bautalene Seitan lagawa sumanaiwalene God anaanawa ainpunden. ¹⁵ Tane ioto oto muwa bedewe inantopu, naita mo sumanai, nu-awadawada ita wanwan euda dodomana kakai-waida waimomp.

3

Ekelesia onionalala ita saubu apanawa gagalou

¹ Gagalo ema ipa ulaipa wade: Apana mida menasadia ekelesia onioniau apanawa wanalepia, sa ipa me nola eudida baiwaleidia

✧ 2:9: 1 Pita 3.3 ✧ 2:13: Bumpai 2.7; Bumpai 2.21,22 ✧ 2:14: Bumpai 3.1-6

dewasapi. ² ✧Tane onionia apanawa mai kadi da dewasapio apana me wawusapu. Me manainapa dea os nata deaitopa waimompa. Me nuawa aiaysiwa ita insaisawa euda dodomana os waimpa, do me ebowa apana euda os wampa. Ita do me sosowa da nuaeuwa mampe duwe banlamompo odompa, do me God aiawa deaitopa waeuwamompe waimpa. ³ Me mai esa badowa kainokaino nampa, me mai ona dewalala, tane euda os waimpa. Do me mai diadiantompa ba mane nuawadawadasampa, dia. ⁴ Tane me duwa bedewa oniempadewalempa, ita me obampa wiwira mampe aiawa ruawantompa. ⁵ Ne epe wadina, ipawa apana mida meba duwa mai onieipadewaleipona me mai God ekelesiawa oniamopia rua, dia.

⁶ Mai mida sumanai bedewe sanaa odena ekelesia onioniau apanawa wanalepi, dia. Naita epe segalepia, me meba asowawa debamalepio omepi ita God me kotusapi, ambi God Seitan mampe dewasana rua. ⁷ Tane do apana ekelesia gonaawa adiwe waimoia me umanawa euda os wampa, ita mai mida kadi wawuwa da me diapu. Tane me euda os waimpa, Seitan me taupia sawa.

⁸ Ita ekelesia saubu apanawa isiwa deawaa dodomana euda os waimompo apana mo umanau euda os wampa. Mo mai lagantompe ba gagalo warebasantompe waimompa, ba esa badowa kainokaino nampa, do mai mane nuau teinepio wadawadawa insempe. ⁹ **Tane mo ideita sumanai waeuwa intawa God sabamosana asiasi antompa, ita mai dima**

✧ 3:2: Taitus 1.6-9

da mo nuau bagorempo insaisau kadilempa.

¹⁰ E bauta ekelesia saubu apanawa nola osowe teamone ewamona. Mo euda os waimompe nolantompo ewana, tauma mo ekelesia nolau sauwa apanawa wanantopu.

¹¹ Deawaa ioto ekelesia saumoie nola dewasaia dodomana euda os waimompo apana mo umanau euda os wampa. Mo mai kutuntompa, dia. Mo nuau aiaisiwa insaisau dodomana waimompa ita apana uduudu mo sumanaibuntompa. ¹² Ekelesia saumodia apanawa manainapa dea os nata waimompa, me obampa ita duwa bedewa oniempadewalempa. ¹³ Sau apanawa nolawa dewasadidewaleidia sumanai sosowa bedeuwo me debamaleide, ita Keriso Iesu sumanaiwa bedewe badowa enedie gagalolepia rua.

¹⁴ Ne leta ema girumantedina, tane insedina walama kerauda os bedewe e manawo wineapa.

¹⁵ Naita mai tauwadea wineapa e leta ema ewane ruawaitane God duwa, sa ipa Godida wanwankasalala ekelesiawa, bedewe deaitopa wanlempa. God ekelesiawa ipa sumanai waeuwaida onieidewantoio inileidie debamaleide. ¹⁶ No uduudu atentene waite waitanase, “No sumanaimba waeuwa debamaia God sabamosana ipa ema epe:

‘Keriso Iesu apanaida etepa wadene no ruambaleno emambo ewatana.

Aleu kakaiwa me bedewe wandia mukawa mampe sabamolen me ipa God Otopa.

Ensel me ewane waimoi.

Me gagalowa uwa daitada apanawa bedeuwo benemantoieno tawo osowe wanwanlala me sumanaiwanton.

Ita God me wadenposideno sapaida bedewe uboo odene alen.’ ”

4

Laga apanawa gagalou

¹ Aleu kakaiwa sabamoido ema bene-mawaleide: Walama ompa osowe apana isiwa sumanaibu epuiapue ita aleu lagawaau banlakadisamoia aiau asisumopu ita aleu kadiu Seitan nolawa sausaia waeuwa wawentopu.

² Waeuwa inainamba ema ipa laga apanawa waeuwantoie lai. Mo nuau ipa bobopa, ia iilala monia mampe suiemo inbolena rua.

³ Apana ipa sa waie waiase, “Mai nainaitana, do nana isiwa iditana.” Tane nana uduudu God dewamona ipa nanala os. Apana mida sumanaintoie ulaipa atentoia nana uduudu baiwa God auwasapue napua rua. ⁴⁻⁵ Ipawa nitu uduudu God dewamona eubu os, ita no mai nana da dabuasate etaa rua, dia. **God aiawa ita raupari nana uduudu eusade, sa baiwa nana uduudu baiwa God auwasante nanta.**

Wasau gagalowa Timoti baiwa

⁶ Timoti, gagalo ema ne girumantena sumanai sosoa isiwa benemamoia. Epe dewaitee e Keriso Iesu nolawa dewalala euda segaite sumanai gagalowa ita waeuwaida euda e waweitena mampee debamaite muka wadaa. ⁷ Tane duduna ton-tau ipusiawaia sauite emoe nambeitaa, ipawa sa mai God mampea, dia. **Tane e eba God insaisawa kainokaino eueuwa osowe itune ateitona.** ⁸ Ete owawa muka wadepia baiwa euwawa winede. Tane God insaisawa owawa

ipa inta daitada bedewe saunede walama ande wainitana ita do walama ando iedia baiwa.

⁹ Aia ema ipa sumanaiwalalaida: ¹⁰ **No insaisamba uduudu Godida wanwankasalala bedewe ituitana. Me ipa ina bumpa apana uduudu baibu, tane sumanaiwalala ipa me mebaawaida. Sa baiwa no sumanaimba bedewe badowa onantite nolantitana.**

¹¹ Wasau gagalowa ema sumanai soso waeuwamoe benemamo. ¹² Ne otona Timoti, e ipa apana sanaa, tane ema baiwa mai mida e ewadabuaepi, dia. Tane e sumanailala baibu eueuwa euda dewasaa. E gagaloa euda, do dewaa mampe, nuawadawadaa, sumanaia ita wanwana euda dodomana os dewamono mo ewompe waawontompa. ¹³ Nuaa uduudu mampe God aiawa apana mampo wisiaitone wasaumone ita waeuwamono leuntape manawo wineapa. ¹⁴ Timoti, apana Aleu kakaiwa mukawa mampe gagalontoie ita ekelesia oniamoia apanawa witapu e osoawo ituieno e God amonawa euwa wadaana. Amona sa God e eneena e ideita nolawaitona, mai ea!

¹⁵ Nola God e eneena nuaa ita insaisaa uduudu mampe dewasaa, ita apana uduudu e nolaa mukamukaua dewasaie bedewe initiana ewapu.

¹⁶ Timoti, e eba ita dima e waeuwaitiana do ewaadewaitaa, mai etedabuitaa, dia. E epe dewaitona e ita mida e gagaloa eteia do inaitana.

5

Obuobu, onialala ita nola dewalala gagalou

¹ Timoti, apana tontawa mai aiaa badowa mampe diaa, tane aia obasa mampe wasausaa,

ewaewawa abo e mamaaida rua. Apana sanaau mampo dewaitaa ewaewawa abo e wanwanaida ruau.

² I tontawa mampe dewaitaa ewaewawa abo e inaida rua. Ita ioto sanaau mampo dewasaa ewaewawa abo e weaweanaaida ruau, ita mai insakadisamoa.

³ Obuobu mo mai mida oniamoipona wiwira mampe ewadewasamona. ⁴ Tane naita obu obampa ba atatawa do waimompa, me atatawa ba obampa ideita sumanaibu eueuwa osowe itumpe nolau dewasampe muba dubu bedewe waimoia oniadewasamompa. Inta ema bedewe mo gombau ita atatau euwa mampe sipoamoi. Dewa ema ipa God insaisawa rua. ⁵ Obu nua-parelala mai mida onieipona me insaisawa udu-udu God bedewe itune tadina ita walama me mampe rauparileidie iririleide. ⁶ Tane obu mida ete ewanauwaleidia ewaewawa inawaa wande, tane me apa bobopa.

⁷ Timoti, sau gagalowa ema obuobu ita mida duwo waimoia do diamowo etapu, ita mai mida mo bedeuwo kadi wawuwa donsapi. ⁸ Tane apana mida me duwe waimoia apanawa ita do me baidasosowa isiwa mai oniadewasamoipona, me sumanaiwa ene lagawa wan. Ema bedewe me sumanaisiawaia apanawa kadiu ainboe kadi-waida dewasade.

⁹ Mai obu da ekelesia mampo sau wadompaa baiwa ebou winedia bedewe itua. Tane obuobu enau 60 ainbolena, tane badawa do dodomana waimoiena, mo os ebou itua. ¹⁰ Obu dewawa euda mampe apana atensaiena baiwa ebowa

itua. Sa ipa obu mida me obampa oniadewasamone odena, apana banlamodio duwe odeia, me meba ituaisilene sumanai sosowa wau mitamona, apana nuaparelala saumona ita nuawa uduudu mampe dewa eubu dodomanau dewamona, me os sau wadompaa baiwa ebowa girumaitaa.

¹¹ Tane obuobu sanaa ebou mai itua, dia. Ipawa mo muba etepu insaisawa mampo wisedio nainai menamodio baiwa Keriso nolawa insaisawa ei. ¹² Epe dewantoie mo dima Keriso mampe sauawantoiena ampuiasai ita ema baiwa mo ando kotuntopu. ¹³ Do mo di wankoantompe du deadea bedewainta waimompe leumpe omo diasampaa dewawa atentoi. Tane mai sa os, do mo kutun wawalala segantopu, apana mampo mo insaisau daitada gagalowa wampa, ba gagalo rebareba di warebasantompe leumpa. ¹⁴ Ema epe segalepia sawa ne menanedia obu sanaau nainaintopue seda gamomopu ita muba dubu oniepu. Mo epe dewantopua no sumanailala emalawoamba mai intawa da donsapie no wawunepi. ¹⁵ Ne gagalona ema wadina, ipawa obu isiwa aitamana inta euda dodomana ene Seitan wawentoiena.

¹⁶ I sumanaila duwa bedewe obuobu waimoia, sa ipa me witape oniamompa ita ekelesia mai sai sa wadapu. Tane ekelesia mo ipa obuobu nuaparelala os ewamompe saumompa.

¹⁷ Mo mida Gagalo euda amonantoi, God aiawa waeuwantoi apanawa ita ekelesia onionialala isiwa do mo mida nolau euda dewasaia ideita uneu natamompe wadompa. ¹⁸ ✧No ema

✧ 5:18: Matiu 10.10; Luk 10.7

atenten, ipawa buka bedewe girumalena ema epe wadi wadiase,

“Pue kau nana wit nolawa dewasadia bedewe mai moawa tauwo nana nasasia di nolalempa.”

Ita do buka wadi wadiase,

“Nola dewalala ideita nolawa sipoa wadepi.”

¹⁹ Naita apana dea meba wisepie ekelesia onionia apanawa kadiwa wawuwa wampo e mai etaa, dia. Tane apana nata ba natadea benemasikiu wampo dealepia tauma mo baibuitee asisuitaa.

²⁰ Tane onionialala bedeuwo mo mida kadi dewasaia ekelesia emauwo sabamo dodomanamono mo sosou isiwa ewapue kadi dewawa sawantopu.

²¹ Keriso Iesu, God ita me enseliwa kakaibu danauwo ne badowa dieedina dima ne girumantena ewee ruawaitaa. Ekelesia oniamoi bedeuwo mai mida e soaida insee baiwa kadiwa wawuwa kerausae, tane soa da diapana me kadiwa wawuwa debamasaa, dia. Tane uduudu dewamoa ipa ewaewa deawaa.

²² **Mai diniwaite tauwadea apana da osowe wita itua ekelesia nolawa wadepia baiwa.** Naita epe dewaitawo apana sa nolakadilepia e do me dewawa kadiwa sa bedeweiten. Tane e eba kakaiwaida euda os wanempa.

²³ Timoti, e kero kainokaino wadempo bua kadilepia sawa mai esaida os nana, tane walama isiwa wain kerauda do nana.

²⁴ Apana isiwa kadiu ipa sabamo ita tauwadea os banlamodio kotuntoi. Tane apana isiwa kadiu ipa werego winamoi, ando sabamontopu.

²⁵ Deawaa dewa eubu isiwa sabamo ewamoa. Ita dewa eubu isiwa mai sabamo winamoipona,

tane e mai weregamoā rua, dia. Sa baiwa mai diniwaite apana ekelesia nolawa wadepia baiwa me osowe witaā itua, dia.

6

¹ Sumanailala mo mida nola dewalala apana debamau baiwu nolantoie poka eteia ideita mo debamau wiwira mampe simbiamompa. Mo epe dewantompo mai mida mo ewamopue God ebowa ita no sumanaimba waeuwa wakadisasapu.

² Tane nola dewalala me mida debamawa sumanaileidia baiwa nolaleidia me do wiwira mampe simbiasampa. Me mai insepiase, “Ne debamana ipa sumanai sona dea, sa baiwa ne wiwirawa epa.” Tane me insepiase, **“Ne debamana ipa sumanai sona dea nuawadawadasadina. Sa baiwa ne ideita noladewantepina me euwa donsapia baiwa.”** Timoti, gagalo ema mo mampo amonaite diamowo ruawantompa.

Mane nuawadawadawa gagalowa

³ Apana isiwa mai Tatamba Iesu Keriso aiawa dodomanaida ba no sumanaimba waeuwa asi-asi waeuwantoi, tane waeuwa da nambea gagalowantoi. ⁴⁻⁵ Mida epe dewaleidia, me ipa asowawa mampe debamaidaleide, tane mai insaisa da debama ba kerauda atenlepona, dia. Me aia isiwa ipawaida umanawa baiwa wampe diadiantompaa kerowa wadede. Dewa ema bedewe obunleide, nuakadikadileide, ituaisileide, sosowa insakadisamode ita aia mampe waie diadiantoi. Mo insaisa dodomana insaisawa mampo dialen

ita do ulaipa sumanaiwa rebasaiena. Mo inseiase, “God simbia nolawa ipa mane donsampe maurantompaa intawa.”

6 Tane no God insaisawa nolawa bedewe simbiantitana. Sa ipa ulaipa maurantitana, mai dima kerauda no mainimboa winedia osowe wampona ewatadabu ete debama baiwantata. ⁷ No tawo ema osowe muntite mai dima da wadape do sabamontepona, dia. Tane do bontate mai dima da wadate do ana, di-aida. ⁸ Nana ita gara no mainimbo winedia, sa ide saunempo osowe wainentaa rua. ⁹ Apana mida tawo ema nituwa uduudu mampe debamaidalepia menasadia, me kadi rubuwa ema bedewe omede. Me epe dewaleidia, sa ipa tawo ewanuauwa insaisawa omaomala diapanau me karo rua taudosaie teineie wanwamba rebarebasaiyo bola kadiwaida bedewe aleide. ¹⁰ **Ne ema epe wadina, ipawa mane nuawadawadawa ipa kadi daitada bumpau.** Apana isiwa mane menaidamodio banusaia sumanai intawa enaiane nambe antone, ita muba nuaparepare daitada mampe nuau nopesai.

¹¹ Tane Timoti, e ipa God apanawaida. Sa baiwa dewa ema uduudu sauite emoe ita dewa dodomana eubu os baiwa nuua uduudu mampe nolaitona. **Deawaa, nuua uduudu mampe God sawaitone simbiasana. Sumanai ita nuawadawada bedewe inite debamaitaa!** Do poka bedewe nolaite aitona ita sosoa do nua aiaisiwa wanlempa. ¹² **Sumanai onawa bedewe ideita poka bedewainta badowa weuwane aitone ompa osowe wie, ita e eba baia inawinakasala wade manawosaa.** E apana uara

danauwo sumanaia Iesu Keriso bedewe ituiana ipawa wasabamosaana walamawe God e inawinakasala ema wadaa baiwa apaen. ¹³ ✧Ne God, mida nitu uduudu ina wanamodia, do Keriso Iesu, mida Pontias Pailat danawe enene sabamo meba umanawa wasabamowa wana, mo nata emauwo gagalona ema badowa dieedina. ¹⁴ Timoti, dima e dewasaa baiwa God e dieena ideita onienadewaitone wanempa. Ita nolaa bedewe mai pin ba wawu da winepi ideita Tatamba Iesu Keriso walama ompa oshowe wisepi. ¹⁵ Me wiwisa walamawa ipa God me meba sonabene ituna rua dewasapio wisepi. **God mida no wadaposisaitana, me os uduudu oniede. Warere uduudu bedewo me dea os debamawaida wande, me ipa no Tatamba ionoidoa.** ¹⁶ **God meba os ipa wanwankasalala, mai diala. Me sapawaida debama bedewe wande,** mai apana da sapa sa mampe alepia rua, diaida. Mai mida da meida ewapona, tane do mai mida me ewepia rua, dia. **Me os no wadaposisanta, muka ipa me mampea, ande ita ando winakasala. Ulaipa, amen.**

Maura apanawa wasaubu gagalowa

¹⁷ Timoti, apana maturalala ema epe diamoa: “Mai puraiwala mauralempo asowawaitana, ba insaisala nitu ema diala bedewe ituna. **Tane insaisala God bedewe ituna, me mida dewa uduudu no menanedia rua debama nuaeuntontaa baiwa nenede.**” ¹⁸ Do diamowo dewa ita nola eubu bedewe maurantompa, ita sosou mampo nuae do amonantompe saumompa.

✧ 6:13: Ion 18.37

¹⁹ Mo epe dewantompa, mo muba baibu maura adibawa winakasala ando baiwa imaasai. Inta ema bedewe mo rua os inaida donsapue wadapu.

²⁰ **O Timoti, nitu uduudu God e witaawosana oniadewasamoa!** Apana isiwa warebasa gagalowa ita gagalo ipasia osowe di diadiantoie waie waiase, “Ema ipa atenida.” Tane e gagalo sa sawaite ea. ²¹ Apana isiwa waienase, “No aten sa wadatana.” Ema bedewe mo sumanaiida intawa enaiane nambe antoiena.

God amonawa euwa e osolawo winompa, niapo!

Ina Sanaa Gagalowa
The New Testament in the Kanasi Language of Papua
New Guinea
Nupela Testamen long tokples Kanasi long Niugini
copyright © 1996 Wycliffe Bible Translators

Language: Kanasi

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0. You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2012-01-20

PDF generated using Haiola and XeLaTeX on 22 Feb 2024 from source files dated 31 Aug 2023
b27bd40e-e091-5268-bcbf-8232e1d7501a